



S'engaschan per l'introducziun dal proporz en Grischun: (en pe) Vincent Augustin, Angelo Andina, Heinz Brand, Ursula Spörri e Jon Pult; (en schanuglias) Christian Thomann e Jürg Kappeler.

FOTO F. ANDRY

«Tgi che di giustizia di proporz»

Comité ProProporz preschenta ses arguments

■ **(anr/fa) Cun excepziun dal Grischun e da l'Appenzell Dadens han tut ils chantuns en Svizra il sistem electoral dal proporz. Al cumenzament da mars decida il suveran grischun sch'ins introducescha era qua il proporz.** Il comité che ha inoltrà l'iniziativa «Per elecziuns gistas», davart la quala i vegn votà ils 3 da mars, consista da partidas e persunalitads da tut il spectrum politic: Da las partidas pps, ps, Verda – Grüne Graubünden, pvl e l'Unìun democratica federala (udf) e da commembers da las partidas pld, pcd e pbd. L'iniziativa prenda ch'il chantun Grischun remplazzia ses sistem electoral actual dal maiorz cun il proporz. La finamira è che las elecziuns per il cussegl grond vegnian fatgas l'onn 2014 tenor il proporz. Gievgia ha envidà il comité a Cuira ad ina conferenza da pressa. Preschents eran il coordinatur da la Verda *Angelo Andina*; il cusseglier naziunal e president da la pps grischuna *Heinz Brand*; il deputà e president da la pvl grischuna *Jürg Kappeler*; il deputà *Vincent Augustin* (pcd, Cuira); il «Landrat» da Tavau *Christian Thomann* da la Partida evangelica svizra (pes) ed il deputà e president da la ps *Jon Pult*. Moderà la conferenza ha *Ursula Spörri* da l'udf.

Cussegl grond, in spievel da la populaziun grischuna?

Angelo Andina ha menziunà che las iniziativa da vart sanestra vegnian sustegnidas en Grischun en media cun almain 40 pertschient da las vuschs, mintgatant schizunt da la maioritad. «En il cussegl grond però vegnan refusadas las propo-

stas e projects da vart cotschna-verda cun grondas maioritads», ha ditg Andina. Il motiv per questa «situaziun paradoxa» è tenor el il sistem dal maiorz ed ils pitschens circuls electorals. «Perquai nun è il cussegl grond in spievel da la voluntad dal pievel grischun», è stada sia conclusiun. Heinz Brand ha ditg ch'il sistem dal maiorz na saja betg democratic. El ha illustrà quai cun l'exempel da las ultimas elecziuns dal cussegl naziunal, tenor il sistem dal proporz: «Las partidas che han survegnì en Grischun ensemen 50 pertschient da las vuschs occupan be gist 16 pertschient dals sez en il cussegl grond.» El ha menziunà ch'il suveran haja sbittà ils ultims 75 onns baingea sis giadas l'introducziun dal proporz, «però era per il dretg da votar da las dunnas hai duvrà pliras votaziuns e nus na vulain bain betg che nus vegnian, sco ils Appenzellais, sfurzads da la dretgira federala da midar il sistem.»

«Regiuns periferas nun han pati dal proporz»

Jürg Kappeler ha numnà l'argument dals adversaris ch'il proporz signifitgia la fin da l'impurtanza politica da las regiuns periferas: «En las ultimas elecziuns dal cussegl naziunal è vegnids elegids represchentants dal Puschlav, dal Partenz, da la Surselva e da la Val Schons», ha ditg il verd-liberal, «ed era las regiuns periferas d'auters chantuns en Svizra, sco p. ex. dal Vallais, dal Tessin u da Berna, è bain represchentadas a Berna.» El haja gia ditg cumbatti per il proporz «sco in dals unics en la pcd, er il temp a la testa da la partida», ha ditg Vincent Augustin. El

haja fatg quai causa ch'el saja persvas ch'il proporz saja tant dal puntg da vista dal dretg public sco era da quel statalpolitic pli gist «ed er pli fair» ch'il maiorz, ha ditg il politicher e giurist.

In privileg per il president da la ps

«Era partidas pitschnas ston pudair esser represchentadas en il parlament», ha punctuà Christian Thomann, deplorond che quai na saja betg il cas tar sia partida, la ps. Il sistem dal maiorz avantagescha tenor el fermamain las grondas partidas: «Dals 120 sez dal parlament grischun occupan la pcd e la pld 72, bainquant dapli che la mesadad», ha ditg il Landrat da Tavau, «e quai era sch'ellas han survegnì tar las ultimas elecziuns dal cussegl naziunal mo 28 pertschient da las vuschs en Grischun.» Quests resultats nun èn tenor el betg represchentativs ed er betg gists. El haja grond plaschair dal comité ProProporz, ha ditg Jon Pult, «la ps cumbatta gia dapli blers onns per l'introducziun dal proporz, ma mes antecessurs presidents da la partida nun han mai gì uschè in grond sustegn.» Quai saja in privileg, è l'idea legrà. Pult ha ditg ch'il sistem dal maiorz actual saja ingist er ord vista geografica e cultural-linguistica: «Co pon ins giustifitgar che Avras ha il dretg per in sez en il cussegl grond, entant che quai nun è il cas per la vallada periferica Samignun cun in'autra lingua ed autra cultura che l'Engiadina Bassa.» La represchentaziun da la diversitad dal chantun Grischun en il parlament è sco ch'el ha punctuà pussaivla mo cun il proporz. Perquai han cusseglià ils sis referents da dir ils 3 da mars gea a l'iniziativa «Per elecziuns gistas».